

INSVLAE AZORES

CGG

BSG

CAssiterides, vulgo Acores seu Flandricæ insulæ, septem sunt, S. Marię, S. Michaelis, Tercera, Graciola, S. Georgij, Pico, Faial, quibus accedunt alię geminæ Flores & Cuervo: quę quidem olim inter Acores non numeratę, hodie tamen eidem dominio subsunt: ita vt vniversę iam novem statuatur. Acores ab Accipitribus seu Nisis, qui primo inventionis tempore, magno ibi numero visabantur, dicuntur: Flandricę quoque nuncupantur, à Flandris Belgis, qui primi insulam Faial incoluerunt, quorum adhuc hodie certę familię inibi illustres sunt, Belgarum ingenium, mores & consuetudinem apprimè repręsentantes, torrentiq; loco quem incolunt, manet nomen Flandrorum, vulgoq; Ribera de Flamencos dicitur. Caput insularum Tercera est, de qua plura, in peculiari quam occupat Tabula; S. Marię insula 12. mill. distat ab insula S. Michaelis 10. aut 12. milliarium circuitu: nullo commercio pręter quam figulinę terrę celebris: Glasto enim seu pastello caret: Ea tamen, quę ad victum necessaria sunt affluunt. A Lusitanis habitatur. Hispanis pręsidiarijs non tenetur, quod scopulis immanibus circumdata, ab incolis satis superque servari queat.

S. Michaelis insula, in longitudine pene 20. mill. habens, vicis mansionibusque frequens est. Lusitani eam colunt, eodemque aere, similibusq; rebus vt Tercera fruitur. Pręcipua vrbs Punta Delgada dicitur, in qua Britannorum, Scotorum ac Gallorum maior frequentia, quam in Tercera, Glasti, ob eiusdem ibidem eximiam copiam, supra bis centena Quintallorum millia, singulis annis ibi distrahitur: Frumenti quoque seracillima est, vt sæpe aliarum insularum inopiam sublevet. Nullos eadem portus habet: Altum vndique mare fremit, minusque tutum est, quam circum Terceram: at nullum ibi propugnaculum prohibet, quo minus ingruente tempestate, plenum Oceanum petant naves, periculi vitandi causa, quod circa Terceram non conceditur: ideo advenarum classes S. Michaelis insulam libenter petunt; Vexillum item Hispanorum ad custodiam vrbs Delgadę, arcem servat.

Graciola insula 7. aut 8. mill. Tercera distat, 5. aut 6. milliaria duntaxat complectens: Amœna admodum ac iucunda est, fructusque fert varios, quibus Terceram ipsam, instruit. Lusitanos habet incolas, nullos verò custodes milites: quod ob exiguitatem, pręsidijs sumptus ferre nequiret.

S. Georgij insula, à Tercera post 8. & 9. mill. conspicitur, longitudine supra 12. mill. arcta tamē, duorum aut trium milliarium latitudine. Montibus frequens est & sylvis. Glasti aliquid habet. Incolę agros colunt; fructusque subinde Terceram devehunt Cedrum arborem abundè fert insula: eius ligna à Tercerę artificibus, qui situs causa ibi degunt, valde expetuntur.

Faial insula, à S. Georgij, ad Africum est, 17. aut 18. milliaria continet, post Terceram & S. Michaelis tertio loco celeberrima: nam omnium rerum ad victum necessariarum abundantia pręstat. Armentis & piscibus adfluit, ipsamque vel Terceram instruit. Glastum item habet, ac ab Anglis ideo frequentatur. Statio pręcipua circa hanc insulam, apud Villam Dorta est, ibi etiam naves vasto mari obiectę sunt. Civitati arx parum firma adiacet. Plurimi hic Belgę habitant, verum iam longa consuetudine Lusitanica lingua vtentes.

Pico insula 15. mill. longitudine nomen habet à monte Pico, qui altitudine montem Pico Canarię superare dicitur. In insula Tercera sereno cœlo conspici facillimè potest, vt vix vno milliari distare videatur, cum 25. fere millia. distantia computetur: nam in extremitate insulę, Fayal versus situs est mons: Eius vertex vltra nubes tendit, cum mons nubibus cœli, & Horizonte tectus sit. Fama huic insulę ideo magna, quę fructifera est, & lignum fert copiosè: Cedrum nempe, ac prætiosum illud, quod Teixo vocant. Regium hoc lignum est: nam & regio edicto cavetur, ne quis illud violet, cum ministri regij duntaxat eius secandi curam habeant. Est duritie summa, colore introrsum rubro, coccineo vndulato, pulchritudine eximia, quę tempore etiam augetur. Hic & naves fabricantur, ob ligni copiam. Pecora habet, ac vini multum, fructusque præstantissimos, inter quos & mala aurea, sapore excellenti, Tercerę ac Lusitanıę hominibus summo opere expetita.

A Flores insula, Terceram vsque 70. mil. numerantur Septem mil. complectitur, nihilque commercio dignum fert pręter Glastum. Pecudes nutrit copiosè, patetq; omnibus advenientibus etiam Anglis, quod incolę eos arcere nequeant.

Corvo exigua insula à Lusitanis habitata à Flores exiguo milliari distat, in circuitu tria aut duo milliaria continet. Circa hanc, & insulam Flores, aut circa eas, Anglorum naves ferè continuo versantur, expectantes classes Indię Occidentalis: nam illis hæ, ex Flandricis insulis primum apparent. Incolę parum inde foeliciter vivunt, obiecti prædationibus ac bonis sæpe exuti.



3689

Comptrols on 27/11/1992
M. G. ... in London

Acores - METELLUS - COLONIA - 1598

1775